

Busovača, 02.10.2014. godine  
Broj: 610/14

**ZAPISNIK I ZAKLJUČCI  
SA ŠESTE SJEDNICE PREDSJEDNIŠTVA SKUPTINE  
SAVEZA OPĆINA I GRADOVA FEDERACIJE BIH**

U Općini Busovača je dana 02.10.2014. godine održana Šesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza pisustvovali su:

1. **g-din Husejin Smajlović**, načelnik Općine Zenica, predsjednik Predsjedništva Saveza;
2. **g-din Edin Smajić**, načelnik Općine Vogošća;
3. **g-din Emir Bubalo**, načelnik Općine Konjic;
4. **g-din Rasim Omerović**, načelnik Općine Kalesija;
5. **g-din Željko Josić**, načelnik Općine Domaljevac- Šamac;
6. **g-din Asim Mekić**, načelnik Općina Busovača;
7. **g-đa Amra Babić**, načelnik Općine Visoko;
8. **g-din Srećko Mikulić**, po ovlaštenju načelnika Općine Grude;
9. **g-din Kristijan Petrović**, po ovlaštenju načelnika Općine Tomislavgrad;
10. **Samira Drakovac**, po ovlaštenju načelnika Općine Goražde.

Pored gore navedenih sjednici su prisustvovali i: g-din **Admir Hadžiemrić**, načelnik općine Travnik i predsjednik Nadzornog odbora Saveza, g-din **Zdravko Čerović**, pomoćnik ministra za razvoj u Federalnom ministarstvu razvoja, poduzetništva i obrt, g-din **Safet Zahirović**, sekretar Općinskog vijeća Breza, g-din **Arif Sirotanović**, zamjenik predsjedavajućeg Općinskog vijeća Breza, g-đa **Vesna Travljanin**, direktor Saveza, g-đa **Zlata Turkić**, viši saradnik za projekte- projekt menadžer, g-din **Amir Kupusija**, viši saradnik za informisanje i odnose sa javnošću i g-đa **Selma Fišek**, viši saradnik za pravna pitanja.

G-din Asim Mekić u ime domaćina pozdravlja prisutne i daje riječ predsjedavajućoj Općinskog vijeća Busovača, g-đi Mirjani Plavčić, da se obrati skupu.

G-đa Mirjana Plavčić pozdravlja sve prisutne i zahvaljuje na dolasku.

G-din Husejin Smajlović pozdravlja prisutne, otvara Šestu sjednicu Predsjedništva Saveza i predlaže dopunu dnevnog reda sa informacijom iz Federalnog ministarstva razvoja, poduzetništva i obrta o Javnom konkursu za odabir korisnika Grant sheme „Unaprijeđenje poduzetničkih zona u Federaciji Bosne i Hercegovine“. Predlaže da se ova tačka uvrsti u Dnevni red kao druga, tj. nakon usvajanja Zapisnika sa prethodne sjednice.

G-din Husejin Smajlović predlaže Dnevni red kako slijedi (uz navedenu informaciju iz Federalnog ministarstva razvoja, poduzetništva i obrta):

1. Zapisnik i Zaključci sa Šestre (vanredne) sjednice Predsjedništva Skupštine Saveza općina i gradova Federacije Bosne i Hercegovine
2. Usvajanje/ verifikacija odlika:
  - a) Odlika o imenovanju predsjednika Saveza općina i gradova Federacije BiH u Upravni odbor i Savjet Federalnog fonda za pomoć nastradalim područjima od

prirodne nesreće na teritoriji Federacije BiH;

- b) Usvajanje/ verifikacija Odluke o imenovanju predsjednika Saveza općina i gradova Federacije BiH u Nadzorni odbor Projekta hitnog oporavka od poplava u BiH (Zajam Svjetske banke za finansiranje Projekta hitnog oporavka od poplava u Bosni i Hercegovini);
- c) Usvajanje/ verifikacija Odluke o imenovanju predsjednika Saveza u Komisiji za izradu Zakona o službenicima i namještenicima u organima uprave i upravnim organizacijama Tuzlanskog kantona.

Izvještilac: Husejin Smajlović, predsjednik Predsjedništva.

### 3. Zakonodavne aktivnosti - zakoni u parlamentarnoj proceduri

- a) Zakon o koncesijama;
- b) Zakon o zaštiti okoliša;
- c) Zakon o osnivanu Fonda za zaštitu okoliša;
- d) Zakon o premjeru i registraciji nekretnine.

### 4. Zabilješke sa sjednica komisija:

- a) Komisija za međunarodne veze, saradnju i evropske integracije;
- b) Komisija za ustavna i zakonodavna pitanja.

Izvjestilac: Zlata Turkić, viši saradnik za rad sa skupštinskim komisijama i institucijama vlasti.

### 5. Raspodjela prikupljenih finansijskih sredstava i zatvaranje podračuna Saveza općina i gradova Federacije „Humanitarna pomoć za poplavljena i klizištem ugrožena područja Federacije Bosne i Hercegovine“.

Izvjestilac: Admir Hadžiemrić, predsjednik Nadzornog odbora.

### 6. Inicijative:

- a) Inicijativa Općinskog vijeća Breza za poduzimanje aktivnosti Saveza o mogućnostima liječenja, školovanja i odvoza komunalnog otpada u Kantonu Sarajevo.

Izvjestilac: Halil Tuzlić, načelnik Općine Breza.

- b) Inicijativa Općinskog vijeća Visoko za poduzimanje dodatnih aktivnosti za rješavanje egzistencijalnih problema radnika neprivatiziranih, djelimično privatiziranih i privatiziranih preduzeća sa područja Općine Visoko.

Izvjestilac: Amra Babić, načelnica Općine Visoko.

- c) NetConsulting- Pismo interesa za ostvarivanje dugoročne saradnje na uvođenju etike i integriteta na lokalnom nivou u Federaciji BiH, a u skladu sa državnim Strategijom za borbu protiv korupcije 2009- 2014 i Općim planom borbe protiv korupcije Federacije BiH 2012- 2014.

### 7. Aktivnosti Saveza na projektima:

- a) Projekat SIDA-e „Strateški okvir za dalji razvoj saveza lokalnih vlasti u BiH“.

Izvjestilac: Šejla Hasić, viši saradnik projekta- projekt menadžer.

- b) Projekat OSCE-a „Podrška savezima općina i gradova“.

Izvjestilac: Amir Kupusija, viši saradnik za informisanje i odnose s javnošću.

- c) Projekat UNDP-a „Sistem obuke za jedinice lokalne samouprave“.

Izvjestilac: Selma Fišek, viši saradnik za pravna pitanja.

- d) Projekat NALAS-a „Efikasnost i transparentnost u upravljanju vodnom i sanitacionom infrastrukturom“.

Izvjestilac: Amir Kupusija, viši saradnik za informisanje i odnose s javnošću.

- e) Projekat u pripremi- Regulatorna reforma

Izvjestilac: Amir Kupusija, viši saradnik za informisanje i odnose s javnošću

### 8. Informacije o:

- a) Javnoj raspravi na Ustavnom sudu Federacije BiH- zahtjev načelnika Općine Kladanj za zaštitu prava na lokalnu samoupravu u vezi Zakona o proglašenju dijela područja planine Konjuh zaštićenim pejzažem „Konjuh“ i Zakona o osnivanju Javne ustanove Zaštićeni pejzaž „Konjuh“.

Izvjestilac: Selma Fišek, viši saradnik za pravna pitanja.

- b) Obavljenoj sistematskoj reviziji Saveza

Izvjestilac: Vesna Travljanin, direktor i Šejla Hasić, viši saradnik za projekte- projekt menadžer

- c) isplati potražnje sredstava od Univerziteta u Sarajevu za Projekat „Načelnici za razvoj lokalne samouprave“  
Izjavitelj: Vesna Travljanin, direktor Saveza.

9. Nastavak aktivnosti Saveza po pitanju izuzimanja jedinica lokalne samouprave od otplate vanjskog duga prema MMF-u.  
Izjavitelj: Ismet Velić, advokat.

10. Tekuća pitanja.

**G-din Husejin Smajlović konstatuje da je Dnevni red jednoglasno usvojen uz predloženo dopunu.**

### **1. Zapisnik i Zaključci sa Šeste (vanredne) sjednice Predsjedništva Skupštine Saveza općina i gradova Federacije BiH**

G-din Husejin Smajlović stavlja na glasanje Zapisnik i Zaključke sa Šeste (vanredne) sjednice Predsjedništva Skupštine Saveza općina i gradova Federacije BiH.

- **Zapisnik i Zaključci sa Vanredne sjednice Predsjedništva Skupštine Saveza općina i gradova Federacije Bosne i Hercegovine su jednoglasno usvojeni.**

G-din Zdravko Čerović pozdravlja prisutne, te ih upoznaje sa aktivnostima Federalnog ministarstva razvoja, poduzetništva i obrta na razvoju poduzetničkih zona. Naglašava da je u „Službenim novinama Federacije BiH“ objavljen Javni konkurs za odabir korisnika Grant sheme „Unaprijeđenje poduzetničkih zona u Federaciji BiH“. Navodi da je ove godine izdvojeno milion KM za razvoj poduzetničkih zona u Federaciji BiH. Ističe da se stavljaju na raspologanje da daju dodatna objašnjenja. Dodaje da je cilj da se unaprijedi najmanje deset poduzetničkih zona u Federaciji BiH, te da se osigura dodatni razvoj za ostale poduzetničke zone. Ističe da je rok za dostavljanje projektnih prijedloga 30 dana od dana objavljivanja Javnog konkursa u „Službenim novinama Federacije BiH“, odnosno do 31.10.2014.

G-đa Amra Babić ističe da Općina Visoko nikada do sada nije koristila ova sredstva iz razloga što od sedam poduzetničkih zona koje imaju, nijedna nije u vlasništvu općine, te su trenutno sve one predmet privatizacije. Naglašava da su im svezane ruke, da trenutno rade Regulacioni plan koji će ići na usvajanje na vijeće sljedeći mjesec. Naglašava da su puno budžetskih sredstava tu usmjerili. Sugerira da se razmisli o tome da i općina Visoko pristupi ovim sredstvima. Napominje da je Općina Visoko bila razvijena 1990. godine, te postavlja pitanje zašto naš sistem onemogućava u tome i koji je kriterij definisao uslove za dobivanje ovih sredstava. Na kraju navodi da je potrebno mijenjati te kriterije i da bi podnijela inicijativu u vezi s tim.

G-din Asim Mekić naglašava da i u Općini Busovača imaju situaciju po ovom pitanju obzirom da općina sada upravlja tim zonama i razvija ih, ali one nisu u općinskom vlasništvu.

G-din Admir Hadžiemrić ističe da problem predstavlja Prostorni plan Federacije BiH koji nije usvijen, a da nemamo problem sa vlasništvom. Naglašava da ne mogu aplicirati na infrastrukturne projekte i da se ne može čekati da se riješe neki administrativni odnosi.

G-din Zdravko Čerović konstatuje da postoji Odluka Vlade Federacije BiH kojom je jasno definisano da su ova sredstva namijenjena nižim nivoima vlasti. Navodi da, ako u ovim konkretnim slučajevima općine upravljaju zonom, mogu dobiti sredstva, obzirom da je

odluci propisano da su korisnici sredstava niži nivoi vlasti. Ističe da oni mogu pokrenuti inicijativu u vezi bržeg usvajanja Regulacionog plana Federacije BiH.

G-đa Amra Babić naglašava da je bitno da općine dobiju sredstva za infrastrukturu a da je onda na njima da riješe imovinske odnose u vezi s tim. Ponavlja da Općina Visoko nije vlasnik poduzetničke zone, ali da upravlja izgradnjom infrastrukture. Navodi da je lokalitet poduzetničkih zona u vlasništvu 25 fizičkih lica i da općina mora tražiti saglasnost, te da su prošle godine dobili odbijenicu za koju smatra da nije utemeljena. Traži savjet od ministarstva kako bi dobili sredstva koja će uložiti u razvoj infrastrukture.

G-din Husejin Smajlović zahvaljuje g-dinu Zdravku Čeroviću i predlaže da Predsjedništvo Saveza primi k znanju ovu informaciju.

- Predsjedništvo Saveza je primilo k znanju informaciju Federalnog ministarstva razvoja, poduzetništva i obrta o objavljenom Javnom konkursu za odabir korisnika Grant sheme „Unaprijeđenje poduzetničkih zona u Federaciji Bosne i Hercegovine“.

## 2. Usvajanje/ verifikacija odluka:

- a) Odluka o imenovanju predstavnika Saveza općina i gradova Federacije BiH u Upravni odbor i Savjet Federalnog fonda za pomoć nastradalim područjima od prirodne nesreće na teritoriji Federacije BiH.
- b) Usvajanje/ verifikacija Odluke o imenovanju predstavnika Saveza općina i gradova Federacije BiH u Nadzorni odbor Projekta hitnog oporavka od poplava u Bosni i Hercegovini (Zajam Svjetske banke za finansiranje Projekta hitnog oporavka od poplava u Bosni i Hercegovini).
- c) Usvajanje/ verifikacija Odluke o imenovanju predstavnika Saveza u Komisiju za izradu Zakona o službenicima i namještenicima u organima uprave i upravnim organizacijama Tuzlanskog kantona.

G-din Husejin Smajlović informiše prisutne da je Savez imenovao svoje predstavnike u Upravni odbor i Savjet Federalnog fonda za pomoć nastradalim područjima od prirodne nesreće na teritoriji Federacije BiH, i to u Upravni odbor- Mehmed Mustabašić, načelnik Općine Maglaj, u Savjet- Husejin Smajlović, načelnik Općine Zenica i Željko Josić, načelnik Općine Domaljevac- Šamac. Također navodi da je u Nadzorni odbor Projekta hitnog oporavka od poplava u BiH imenovan Rusim Omerović, a koji je imenovan i u Komisiju za izradu Zakona o službenicima i namještenicima u organima uprave i upravnim organizacijama Tuzlanskog kantona. Naglašava da su ova imenovanja da su ova imenovanja izvršena prije sjednice Predsjedništva Saveza zbog zadatih rokova, te ostavlja mogućnost članovima Predsjedništva da, ukoliko žele, predlože druge kandidate za predstavnike Saveza u gore navedena tijela.

Predsjedništvo zaveza je jednoglasno usvojilo prijedlog kandidata/ verifikovalo odluke o predstavnicima Saveza općina i gradova Federacije BiH u sljedeća tijela:

- Mehmed Mustabašić u Upravni odbor Federalnog fonda za pomoć nastradalim područjima od prirodne nesreće na teritoriji Federacije BiH;
- Husejin Smajlović i Željko Josić u Savjet Federalnog fonda za pomoć nastradalim područjima od prirodne nesreće na teritoriji Federacije BiH;
- Rasim Omerović u Komisiji za izradu Zakona o službenicima i namještenicima u organima uprave i upravnim organizacijama Tuzlanskog kantona.

## 3. Zakonodavne aktivnosti- zakoni u parlamentarnoj proceduri

- a) Zakon o koncesijama
- b) Zakon o zaštiti okoliša
- c) Zakon o osnivanju Fonda za zaštitu okoliša
- d) Zakon o premjeru i registraciji nekretnina

G-đa Zlata Turkić izvještava da su navedeni zakoni u parlamentarnoj proceduri i naglašava da je Prijedlog Zakona o koncesijama usvojen na Predstavničkom domu Parlamenta Federacije BiH, te da je na veliko insistiranje Saveza stavljen na Dnevni red Doma naroda Parlamenta Federacije BiH, ali da o njemu još nije vođena rasprava. Ističe da su uz Prijedlog ovog zakona koji je dostavljen delegatima u Domu naroda dostavljeni i amandmani Kluba Hrvata i Mustafe Kurtovića. Navodi da su amandmani Kluba Hrvata odnose na izmjenu predložene raspodjele sredstava po osnovu dodjele koncesije i to na način da općinama i dalje ostaje procenat od 60%, kantonima procenat od 30% i Federaciji BiH procenat od 10%. Naglašava da je Komisija za ustavna i zakonodavna pitanja raspravljajući o amandmanima Mustafe Kurtovića koji se odnosi na izuzimanje nekih predmeta dodjela koncesija datih u Prijedlogu zakona lokalnim zajednicama, predložila Predsjedništvu Saveza da uputi dopis Domu naroda Parlamenta Federacije BiH u kome će tražiti da se amandman Mustafe Kurtovića odbaci kao neosnovan.

G-din Husejin Smajlović ističe da je Savez protiv amandmana Mustafe Kurtovića.

G-din Emir Bubalo naglašava da je bio u radnoj grupi prije četiri godine kada je rađen ovaj zakon, te da je tada utvrđen procenat od 75% za lokalne zajednice, što znači da je Vlada bez našeg znanja smanjila taj procenat na 60%. Ističe neslaganje sa amandmanima Mustafe Kurtovića.

G-đa Zlata Turkić dalje navodi da su Nacrt Zakona o zaštiti okoliša i Nacrt Zakona o osnivanju Fonda za zaštitu okoliša u javnoj raspravi i da se općine tu trebaju uključiti.

G-đa Selma Fišek informiše Predsjedništvo Saveza da je Predstavnički dom Parlamenta Federacije BiH 08.07.2014. godine usvojilo Nacrt Zakona o premjeru i registraciji nekretnine te da je određena javna rasprava u trajanju od 120 dana kako bi se svi zainteresovani mogli uključiti u istu.

G-din Emir Bubalo navodi da je Zakon o zaštiti okoliša preopširan te da se ne mogu sva pitanja riješiti jednim zakonom.

G-din Husejin Smajlović ističe da se treba ozbiljno uključiti u ova pitanja.

G-din Emir Bubalo izražava apsolutno neslaganje sa Nacrtom Zakona o premjeru i registraciji nekretnina.

G-din Husejin Smajlović ističe da je javna rasprava prilika da se izraze stavovi i mišljenja.

G-din Emir Bubalo naglašava da općinama i gradovima koji su centri kantona odgovara da zemljišna knjiga bude u kantonu. Također ističe da Hercegovačko-neretvanski kanton već ima osnovan Fond za zaštitu okoliša i da je isti sam po sebi svrha.

G-din Husejin Smajlović navod da ćemo imati stav o prijedlozima zakona, a da je ovo sada informacija o tome u kojoj se fazi isit trenutno nalazi.

Nakon rasprave, Predsjedništvo Saveza je primilo k znanju informacije o prijedlogu Zakona o koncesijama, nacrtu Zakona o zaštiti okoliša, nacrtu Zakona o osnivanju Fonda za zaštitu okoliša, te nacrtu Zakona o premjeru i registraciji nekretnina uz sljedeće zaključke:

- **Predsjedništvo Saveza ne podržava amandman Mustafe Kurtovića na Prijedlog Zakona o koncesijama koji se odnosi na izuzimanje nekih predmeta dodjele koncesija datih u Prijedlogu zakona lokalnim zajednicama;**

- Savez će uputiti dopis Domu naroda Parlamenta Federacije BiH kojim će tražiti da se amandman Mustafe Kurtovića odbaci kao neosnovan.

#### 4. Zabilješka sa sjednice komisija:

- a) Komisija za međunarodne veze, saradnju i evropske integracije;
- b) Komisija za ustavna i zakonodavna pitanja.

G-din Husejin Smajlović ističe da je dostavljen materijal u pisanoj formi za ovu tačku dnevnog reda, te otvara raspravu. Nakon konstatacije da nema prijavljenih za raspravu, daje na glasanja Zabilješka sa sjednice komisije:

- Predsjedništvo Saveza je jednoglasno usvojilo Zabilješku sa sjednice Komisije za međunarodne veze, saradnju i evropske integracije i Zabilješku sa sjednice Komisije za ustavna i zakonodavna pitanja sa pripadajućim zaključcima kako slijedi:

Komisija za međunarodne veze, saradnju i evropske integracije:

- Komisija podržava održavanje NEXPO sajma općina i gradova kao dobru praksu izlaganja dostignuća lokalnih zajednica i koordinacije lokalnih zajednica sa područja Jugoistočne Evrope;
- Komisija predlaže Predsjedništvu Saveza da uputi dopis NALAS-u kome će tražiti koncept organiziranja NEXPO-a u Plovdivu (Bugarska) 2015. godine sa ciljem blagovremene pripreme općina/ gradova u FBiH i donošenja vlastitog koncepta nastupa Saveza i članica Saveza u vezi sa ovim sajmom;
- Do iduće sjednice Komisije pripremiti informaciju o postojanju strateških planova u općinama FBiH;
- Savez treba kontaktirati UNDP- Projekat ILDP u vezi sa mogućnostima pomoći ovog projekta u izradi strateških planova u općinama koje nisu u mogućnosti samostalno izraditi iste;
- U izradi Strategije razvoja Saveza 2014- 2020 godina razraditi opravdanost uspostave Jedinice za evropske integracije;
- Pri izboru učesnika na pojedinim međunarodnim skupovima voditi računa o tome da se prioriteti daju članovima pripadajućih komisija Saveza, zavisno od teme skupa;
- Savez treba provesti anketiranje jedinica lokalne samouprave o potrebama za edukacijom o EU fondovima i pripremanju projekata do naredne sjednice Komisije.

Komisija za ustavna i zakonodavna pitanja:

- Prijedlog zakona o izmjenama i dopunama Zakona o porezu na promet nepokretnosti Tuzlanskog kantona je u skladu sa Ustavom i Zakonom;
- Potrebno je ocijeniti koliko izmjene utiču na ekonomsko funkcionisanje jedinica lokalnih zajednica sa područja Tuzlanskog kantona;
- U najvećoj mogućoj mjeri uvažiti mišljenja jedinica lokalne samouprave sa područja Tuzlanskog kantona pošto se radi o 100%- nom prihodu jedinica lokalne samouprave.

#### 5. Raspodjela prikupljenih finansijskih sredstava i zatvaranja podračuna Saveza općina i gradova Federacije BiH „Humanitarna pomoć za poplavljena i klizištem ugrožena područja Federacije Bosne i Hercegovine“.

G-din Admir Hadžiemrić navodi da je na području Saveza do sada prikupljeno 1.500,00 eura (Općina Trzin/Slovenija je uplatila 500,00 eura i Udruženje gradova Crne Gore je uplatilo 1.000,00 eura), ističe da daje sredstva Savezu na raspolaganje, te da je potrebno zatvoriti podračun.

G-din Amir Kupusija napominje da se očekuje uplata od strane Grada Ulcinja u iznosu od 2.000,00 eura.

G-din Husejin Smajlović predlaže da Savez prikupljena finansijska sredstva uplati na račun Općine Kalesija.

- Predsjedništvo Saveza je jednoglasno usvojilo odluku da se finansijska sredstva sa podračuna Saveza „Humanitarna pomoć za poplavljena i klizištem ugrožena područja Federacije Bosne i Hercegovine“ u iznosu od 1.500,00 eura uplati na račun Općine Kalesija te da se ovaj podračun ugasi.

## 6. Inicijative:

- a) Inicijativa Općinskog vijeća Breza za poduzimanje aktivnosti Saveza o mogućnostima liječenja, školovanja, i odvoza komunalnog otpada u Kanton Sarajevo.

G-din Safet Zahirović ističe da je počašćen što prisustvuje sastanku. Naglašava da je od prvog saziva vijeća postojao problem o ovom pitanju. Navodi da je zaključak Općinskog vijeća Breza bio da se kroz Savez općina i gradova Federacije BiH pokušaju naći rješenja za rješavanje ovog problema. Moli članove Predsjedništva Saveza da kroz svoje djelovanje pokušaju pomoći po ovom pitanju Općini Breza. Ističe da mu je kao pravniku poznato da ova inicijativa zahtjeva izmjenu zakonskih propisa.

G-din Arif Sirotanović ističe da je Općina Breza od Sarajeva udaljena 25 km, a od Zenice 60 km. Navodi da porodilje imaju problem dok dođu do Zenice, zatim ističe problem saobraćajnih i rudarskih nesreća, jer se zna desiti da osobe iskrvare na putu do Kantonalne bolnice Zenica. Naglašava da se o ovom problemu konstantno raspravlja na sjednicama vijeća i da mu je poznato koje su sve procedure potrebne da bi se riješili ovi problemi za dobrobit građana. Smatra da je Predsjedništvo Saveza tijelo koje može pokrenuti ove aktivnosti kroz izmjene Zakona o zdravstvu. Također, za primjer navodi penzionere sa niskim primanjima ili plućne bolesnike kojima je veliki problem doći u Zenicu. Ističe da u Općini Breza problem predstavljaju i subvencije za lijekove, jer se u Brezi svi lijekovi plaćaju, za razliku od nekih drugih kantona, te ističe da nebi trebalo biti diskriminacije između građana po ovom pitanju. Moli Predsjedništvo Saveza da u okviru svojih mogućnosti pruži pomoć Općini Breza u vezi sa inicijativom za liječenje građana Općine Breza u Kantonu Sarajevo.

U raspravi je još istaknuto da je Općina Olovo uspjela riješiti ovaj problem i da se građani Olova liječe u Kliničkom centru u Sarajevu.

G-din Asim Mekić konstatuje da bi ovakav pristup značio selektivno rješavanje problema iz razloga što svugdje ima ovih problema. Smatra da je potrebno pokrenuti inicijativu za jednostavno rješavanje problema. Dodaje da je bio u sazivu Predstavničkog doma Parlamenta Federacije BiH kada je usvijen Sporazum o liječenju građana Olova u Kliničkom centru u Sarajevu.

Nakon rasprave, Predsjedništvo Saveza je jednoglasno usvojilo sljedeći zaključak:

- Podržava se inicijativa Općine Breza za poduzimanje aktivnosti Saveza o mogućnostima liječenja u Kantonu Sarajevo kroz donošenje izmjena Zakona o zdravstvenoj zaštiti koji neće diskriminisati građane.
- b) Inicijativa Općinskog vijeća Visoko za poduzimanje dodatnih aktivnosti za rješavanje egzistencijalnih problema radnika neprivatiziranih, djelimično privatiziranih i privatiziranih preduzeća sa područja Općine Visoko.

Istaknuto je da sve općine imaju isti problem u vezi sa ovim pitanjem.

- Predsjedništvo Saveza je jednoglasno podržalo inicijativu Općinskog vijeća Visoko za poduzimanje dodatnih aktivnosti za rješavanje egzistencijalnih problema radnika neprivatiziranih, djelimično privatiziranih i privatiziranih preduzeća sa područja Općine Visoko.
- c) NetConsulting- Pismo interesa za ostvarivanje dugoročne saradnje na uvođenju etike i integriteta na lokalnom nivou u Federaciji BiH, a u skladu sa državnom Strategijom za borbu protiv korupcije 2009- 2014 i Općim planom borbe protiv korupcije Federacije BiH 2012- 2014.
- Predsjedništvo Saveza je dalo pozitivan odgovor i podršku Pismu interesa upućenog Savezu od strane NetConsulting-a koje se odnosi na ostvarivanje dugoročne saradnje na uvođenju etike i integriteta na lokalnom nivou u Federaciji BiH, a u skladu sa državnom Strategijom za borbu protiv korupcije 2009- 2014 i Općim planom borbe protiv korupcije Federacije BiH 2012- 2014.

## 7. Aktivnosti Saveza na projektima

- a) Projekat SIDA-e „Strateški okvir za dalji razvoj saveza lokalnih vlasti u BiH“
- b) Projekat OSCE-a „Podrška savezima općina i gradova“
- c) Projekat UNDP-a „Sistem obuke za jedinice lokalne samouprave“
- d) Projekat NALAS-a „Efikasnost i transparentnost u upravljanju vodnom i sanitacionom infrastrukturom“
- e) Projekat u pripremi- Regulatorna reforma

G-đa Šejla Hasić informiše članove Predsjedništva o projektu Regulatorne reforme kroz koji je potencijalni donator- SIDA, tražio da se uradi sistemska revizija Saveza. Navodi da je Savez tokom jučerašnjeg dana dobio izvještaj revizorske kuće, te da je zbog toga isti nije mogao biti dostavljen u materijalima za sjednicu. Napominje da je izvještaj napisan na engleskom jeziku i da će članovima Predsjedništva biti poslan preveden glavni dio izvještaja. Naglašava da je bitno da je revizijom utvrđeno da Savez djeluje u skladu sa zakonskim procedurama i da je sposoban za vođenje projekata. Dodaje da je u izvještaju revizije sugerisano da je potrebno izraditi određene dodatne pravilnike.

G-đa Šejla Hasić dalje navodi da Savez trenutno implementira projekat pod nazivom „Strateški okvir za dalji razvoj saveza lokalnih vlasti u BiH“ koji je finansiran od strane SIDA-e, a kroz koji će se izraditi Strateški plan Saveza za period 2015- 2019. Godine i okvirni akcioni planovi Saveza za navedeni period.

- Predsjedništvo Saveza je primilo k znanju informacije i podržalo aktivnosti Saveza na sljedećim projektima:
  - a) Projekat SIDA-e „Strateški okvir za dalji razvoj saveza lokalnih vlasti u BiH“;
  - b) Projekat OSCE-a „Podrška savezima općina i gradova“;
  - c) Projekat UNDP-a „Sistem obuke za jedinice lokalne samouprave“;
  - d) Projekat NALAS-a „Efikasnost i transparentnost u upravljanju vodnom i sanitacionom infrastrukturom“;
  - e) Projekat u pripremi- Regulatorna reforma.
- Predsjedništvo Saveza je jednoglasno usvojilo Set preporuka za unaprijeđenje međusobne saradnje između Saveza i općinskih/ gradskih vijeća ( Projekat OSCE-a „Podrška savezima općina i gradova“).
- Predsjedništvo Saveza je jednoglasno usvojilo Prijedlog liste trenera utvrđen u skladu sa Pravilnikom o izboru izvođača obuke i stručnog usavršavanja u jedinicama lokalne samouprave u Federaciji Bosne i Hercegovine (Projekat UNDP-a „Sistem obuke za jedinice lokalne samouprave“).



## 8. Informacije o:

a) Javnoj raspravi na Ustavnom sudu Federacije BiH- zahtjev načelnika Općine Kladanj za zaštitu prava na lokalnu samoupravu u vezi Zakona o proglašenju dijela područja planine Konjuh zaštićenim pejzažem „Konjih“ i Zakona o osnivanju Javne ustanove Zaštićeni pejzaž „Konjih“.

- G-đa Selma Fišek navodi da je 09.09.2014. godine na Ustavnom sudu Federaciji BiH održana javna rasprava po zahtjevu načelnika Općine Kladanj za zaštitu prava na lokalnu samoupravu u vezi Zakona o proglašenju dijela područja planine Konjuh zaštićenim pejzažem „Konjuh“ i Zakona o osnivanju Javne ustanove Zaštićeni pejzaž „Konjuh“.

## b) Obavljenj sistemskoj reviziji Saveza

- G-đa Šejla Hasić je o ovoj tački dnevnog reda izvjestila u okviru tačku 7. (Aktivnosti Saveza na projektima).

## c) Isplati potražnje sredstava od Univerziteta u Sarajevu za Projekat „Načelnici za razvoj lokalne samouprave“.

- G-đa Vesna Travljanin informiše Predsjedništvo da je tokom implementacije projekta „Načelnici za razvoj lokalne samouprave“ koji se sprovodi sa Centrom za ljudska prava Univerziteta u Sarajevu i koji je bio finansiran od strane Švicarske agencije za razvoj i saradnju (SDC) i Švicarske Ambasade u Sarajevu, dopisom Centra za ljudska prava Univerzitet u Sarajevu, Savez informisan o pronevjeri finansijskih sredstava u iznosu od 30.579,80 KM. Ističe da je s obzirom na činjenicu dugovanja Saveza prema akterima na projektu i nizu dopisa upućenih Rektoratu Univerziteta u Sarajevu i Centru za ljudska prava Univerziteta u Sarajevu koji nisu dali rezultate, Savez bio prinuđen poslati opomenu pred tužbu prema pomenutim intitucijama. Nakon toga, Savez je sa Centrom za ljudska prava Univerziteta u Sarajevu potpisao amandman o regulisanju isplate troškova nastalih u toku implementacije projekta u iznosu od 30.579,80 KM u obrocima, te će Savez na osnovu pristiglih uplata uredno izmirivati svoje obaveze nastale na projektu.

- Predsjedništvo Saveza je primilo k znanju ovu informaciju.

## 9. Nastavak aktivnosti Saveza po pitanju izuzimanja jedinica lokalne samouprave od otplate vanjskog duga prema MMF-u

G-din Ismet Velić upozna je članove Predsjedništva sa dosadašnjim aktivnostima Saveza po pitanju izuzimanja jedinica lokalne samouprave od otplate vanjskog duga prema MMF-u, napominje da je urađena dopuna „Analize mogućih načina ostvarivanja pravne zaštite općine u vezi sa otplatom vanjskog duga“. Naglašava da su općine oštećene za iznos od 18.202.128,00 KM za 2013. godinu, te konstatuje da ovaj iznos predstavlja vrijednost spora. Naglašava da je vrijednost spora vrlo visoka i da se prema njoj određuju svi drugi troškovi vođenja postupka. Smatra da prije podnošenja tužbe još jednom trebamo konkretno dogovoriti korake. G-din Ismet Velić dalje navodi da bi ovo bio redovni parnični postupak, te da postoji revizija od strane Vrhovnog sda Federacije Bosne i Hercegovine i apelacija prema Ustavnom sudu Bosne i Hercegovine, te prema Sudu za ljudska prava u Strazburu. Ukazuje i na postojanje postupka izvršenja (ukoliko bismo imali pravosnažnu presudu u našu korist). Ističe da možemo konkretno razgovarati o detaljima tužbe ukoliko se Predsjedništvo Saveza slaže. Dodaje da bi advokatske tarive bilo vrlo visoke u slučaju ovog spora i da bi za općine to bila visoka cijena, ali da je moguće i na drugi način

regulisati pitanje naknade za advokata npr. odrediti paušalni iznos, odnosno kroz ugovorom sa advokatom definisati fiksni iznos naknade.

G-din Husejin Smajlović predlaže da se pripremi tužba protiv Vlade Federacije BiH, te da im se ponudi nagodba koja bi uključivala dva elementa: 1) da prezentiramo Vladi Federacije analizu o tome koliko općine gube po osnovu otplate vanjskog duga prema MMF-u i 2) da se tom praksom prekine u budućem periodu. Također, smatram da dolazi do pogrešne primjene upustva.

G-din Ismet Velić smatra da ne dolazi do pogrešne primjene Zakona o pripadnosti javnih prihoda, nego da nedostaju zakonske odredbe o sravnjavanju sredstava.

G-din Emir Bubalo naglašava da svako mora vraćati svoj dio duga.

G-đa Amra Babić predlaže da se ide drugim putem- da idemo sa inspekcijom prema ministru koji je odgovoran za pogrešnu primjenu upustva.

G-din Emir Bubalo smatra da se ovim treba izaći u javnost. Ističe da od 2008. godine PDV naglo opada.

G-din Edin Smajić predlaže da se pripremi tužba za 2013. godinu i da se u dopisu prema Vladi Federacije BiH navede da postoji dug iz ranijih godina. Naglašava da je osnovni cilj Saveza da se prekine ova praksa sa 2013- om godinom.

Nakon rasprave, Predsjedništvo Saveza je jednoglasno usvojilo sljedeće zaključke:

- Savez općina i gradova Federacije BiH će, putem advokata, uputiti opomenu pred tužbu Vladi Federacije BiH kojom će tražiti da se:
  - Jedinicama lokalne samouprave izvrši povrat iznosa od 18.202.182,00 KM, za koji su im u 2013. godini umanjena pripadajuća sredstva sa jedinstvenog računa, po osnovu otplate duga prema MMF-u;
  - Uбудuće prekinuti praksu koja dovodi do umanjenja pripadajućih sredstava jedinice lokalne samouprave, odnosno da se uspostavi sistem otplate vanjskog duga tako da općine dug ne isplaćuju u većem iznosu, više puta, odnosno da iste ne isplaćuju nepostojeći dug.
- Ukoliko se u razumnom roku ne izvrši zahtijevani povrat sredstava, te izostane reakcija Vlade Federacije BiH u vezi sa pomenutim aktivnostima, Savez općina i gradova Federacije BiH će podići tužbu i pokrenuti postupak kod nadležnog suda, sa zahtjevom za isplatu ukupnog iznosa za koji su umanjena pripadajuća sredstva jedinica lokalne samouprave, sa zakonskim zateznim kamatama, te naknadom svih troškova sudskih postupaka, u skladu sa tužbom;
- Kopije opomene pred tužbu uputiti svim ministrima u Vladi Federacije BiH.

## 10. Tekuća pitanja

Pod ovom tačkom Dnevnog reda nije bilo diskusije.

Nakon konstatacije da su sve tačke Dnevnog reda iscrpljene, g-din Husejin Smajlović zatvara Šestu sjednicu Predsjedništva Saveza u 13.55 sati.

Zapisnik sačinila  
Selma Fišek, s.r.

Predsjednik Predsjedništva Skupštine Saveza  
Husejin Smajlović, s.r.